

蒲江詞一卷

盧祖皋

蒲江詞

目錄

賀新郎二調
倦尋芳一調
烏夜啼三調
洞仙歌一調
夜飛鵲慢一調
沁園春一調
好事近一調

宴清都一調
西江月一調
謁金門二調
鷓鴣天二調
漁家傲一調
菩薩蠻一調

魚遊春水一調
清平樂一調
水龍吟二調
摸魚兒一調
木蘭花慢一調
蒲江紅一調

蒲江詞目錄終

蒲江詞目錄

蒲江詞

宋 盧祖皋

賀新郎

彭傳師於吳江三高堂之前作釣雪亭蓋擅漁人之窟宅以供詩境也趙子野約余賦之（傳師中興詞選作傳師）

挽住風前柳。問鴟夷當日扁舟。近曾來否。月落潮生無限事。零落茶煙未久。慢留得、蓴鱸依舊。可是功名從來誤。撫荒詞誰繼風流後。今古恨、一搔首。江涵雁影梅花瘦。四無塵雪飛雲起。夜窗如畫。萬里乾坤清絕處。付與漁翁釣叟。又恰是題詩時候。猛拍闌干呼鷗鷺。道他年我亦垂綸手。飛過我、共尊酒。（雲起一作風起）

又 姑蘇臺觀雪

十頃涵空碧。畫圖中、崢嶸勾玉。亂零吹壁。倚徧危闌吟不盡。把酒風前岸幘。記當日、西湖爲客。誰翦吳松江上水。笑乾坤奇事成兒劇。還照我、夜窗白。崇臺目斷清無極。引枝筇瓊瑤步輦。印登臨屐。娃館娉婷知何在。淚粉愁濃恨積。故化作飛花狼籍。舊事悠悠渾莫問。有玉蟾醉裏曾相識。聊伴我、吹羌笛。（勾玉一作幻玉。吹羌笛一作夜吹笛。或病二尾句相似。應作吹羌笛。）

宴清都（初春）

蒲 江 詞

春訊飛瓊管。風日薄。度牆啼鳥聲亂。江城次第。笙歌翠合。綺羅香暖。溶溶澗綠冰泮。醉夢裏年華暗換。料黛眉重鎖隋隄。芳心還動梁苑。新來雁闊雲音。鸞分鑑影。無計重見。啼春細雨。籠愁澹月。恁時庭院。離腸未語先斷。算猶有、凭高望眼。更那堪、芳草連天。飛梅弄晚。

魚遊春水（離愁）

離愁禁不去。好夢別來無覓處。風翻征袖。觸目年芳如許。軟紅塵裏鳴鞭轡。拾翠叢中勾伴侶。都負歲時。暗關情緒。昨夜山陰杜宇。似把歸期驚倦旅。遙知樓倚東風。凝翠暗數。寶香拂拂。遺鴛錦。心事悠悠尋燕語。芳草暮寒。亂花微雨。（征袖。花庵集作征袂。）

倦尋芳（春思）

香泥壘燕。密葉巢鶯。春晴寒淺。花徑風柔。著地舞裊紅輦。鬪草煙欺羅袂薄。鞦韆影落春遊倦。醉歸來。記寶帳歌慵。錦屏香暖。別來悵。光陰容易。還又荼蘼。牡丹開遍。妒恨疎狂。那更柳花迎面。鴻羽難憑芳信短。長安猶近。歸期遠。倚危樓。但鎮日、繡簾高捲。

西江月（中春）

燕掠晴絲。魚吹水葉。鰲鱗禁街微雨。灑芳塵。寒食清明相近。漫著宮羅試暖。閑呼社酒酬春。晚風簾幕悄無人。二十四番花訊。

清平樂（春恨）

柳邊深院。燕語明如翦。消息無憑聽又懶。隔斷畫屏雙扇。寶杯金鑲紅牙。醉魂幾度兒家。何處一春遊蕩。夢中猶恨楊花。

烏夜啼（離恨）

柳色津頭。綠桃花渡口。啼紅一春又負西湖醉。離恨雨聲中。客袂迢迢西塞。餘寒翦翦東風。誰家拂水飛來燕。惆悵小樓空。

又（西湖）

漾暖紋波。颭颭吹晴絲雨濛濛。輕衫短帽西湖路。花氣撲春聰。鬪草褰衣溼翠。鞦韆瞥眼飛紅。日長不放春醪困。立盡海棠風。

又（秋別）

段段寒沙淺水。蕭蕭暮雨孤蓬。香羅不共征衫遠。砧杵客愁中。別恨慵看楊柳。歸期暗數芙蓉。碧梧聲到紗窗曉。昨日幾秋風。

謁金門（惜別）

蘭棹舉。相趁落紅飛去。一隙輕簾凝睇處。柳絲牽不住。昨日翠蛾金縷。今夜碧波烟渚。好夢無憑窗又雨。天街知幾許。（天街一作天涯）

又（春思）

開院宇。獨自行來行去。花片無聲簾外雨。峭寒生碧樹。做弄清明時序。料理春醒情緒。憶得歸時停棹處。畫橋看落絮。

水龍吟（茶蘼）

蕩紅流水無聲。暮煙細草粘天遠。低回倦蝶。往來忙燕。芳期頓懶。綠霧迷牆。翠虬騰架。雪明香暖。笑依依欲挽。春風教住。還疑是相逢晚。不似梅妝瘦減。占人間。丰神蕭散。攀條弄蕊。天涯猶記。曲闌小院。老去情懷。酒邊風味。有時重見。對枕幃空想。東窗舊夢。帶酒離恨。（帶酒一作帶將）

又（淮西重午）

會昌湖上扁舟。幾年不醉西山路。流光又是。宮衣初試。安榴半吐。千里江山。滿川煙草。薰風淮楚。念離騷恨遠。獨醒人去。闌干外。誰懷古。亦有魚龍戲舞。豔晴川。綺羅歌鼓。鄉情節意。尊前同是。天涯羈旅。漲綠池塘。翠陰庭院。歸期無據。問明年此夜。一眉新月。照人何處。

洞仙歌（茉莉）

玉肌翠袖。較似茶蘼瘦。幾度熏醒夜窗酒。問炎州何事。得許清涼。塵不到。一段冰壺翦就。晚來庭戶悄。暗數流光細。拾芳英。黯回首。念日暮江東。偏爲魂銷人易老。幽韻清標似舊。政簾紋如水。帳如煙。更奈向月明。露濃時候。

鷓鴣天（春懷）

纖指輕拈小砑紅。自調宮羽按歌童。寒餘芍藥闌邊雨。香落荼蘼架底風。閒意態。小房櫺。丁寧須滿玉西東。一春醉得鶯花老。不似年時怨玉容。

又（春暮）

庭綠初圓結蔭濃。香溝收拾樹梢紅。池塘少歇鳴蛙雨。簾幕輕迴舞燕風。春又老。笑誰同。澹煙斜日小樓東。相思一曲臨風笛。吹過雲山第幾重。

摸魚兒（九日登姑蘇臺）

怪西風曉來欲帽。年華還是重九。天機袞袞山新瘦。客子情懷誰剖。微雨後。更雁帶邊寒。裊裊欺羅袖。慵荷捲柳。諒不似黃花。田田照眼。風味儘如舊。登臨地。寂寞崇臺最久。闌干幾度搔首。翻雲覆雨無窮事。流水斜陽知否。吟未就。但衰草寒煙。商略愁時候。閒愁浪有。總輸與淵明。東籬醉舞。身世付杯酒。

夜飛鵲慢（別意）

驕慙破清曉。分恨臨期。花下恁月明知。餘光是處散離思。最憐香靄霏霏。牽衣搵彈淚。問淒風。愁露剗地東西。留鞭換佩。怕匆匆已是遲遲。涼怯幾番羅袂。還燕別文梁。螢點書幃。一自秋娘迢遞。黃金對酒。爭忍輕揮。新來院落。雁難尋。簾幕長垂。怕彫梧敲徑。驚回舊夢。應也顰眉。

漁家傲（壽白石先生）

白石山中風景異。先生日日懷歸計。何事黃岡飛雪地。偏著意。畫堂卻爲東坡起。人說前身坡老是。文章氣節渾相似。只待鼎彝勳業遂。梅花外。歸來長向山中醉。

木蘭花慢（別西河兩詩僧）

嫩寒催客棹。載酒去。載詩歸。政紅葉漫山。清泉漱石。多少心期。三生溪橋話別。恨薜蘿猶惹翠雲衣。不似今番醉夢。帝城幾度斜暉。鴻飛。煙水瀾瀾。回首處。只君知。念吳江鷺憶。孤山鶴怨。依舊東西。高峯夢醒雲起。是瘦吟窗底。憶君時。何日還尋後約。爲余先寄梅枝。

沁園春（雙溪狎鷗）

幾葉凋楓。半篙寒日。傍橋繫船。愛洞門深鎖。人間福地。雙溪分占。天上星躔。破帽倚寒。短鞭敲月。此地經行知幾年。空贏得。似沈郎消瘦。還欠詩篇。沙鷗伴我愁眠。向水驛風亭紅蓼邊。有村醪可飲。且須同醉。溪魚堪鱸。切莫論錢。笠澤波頭。垂虹亭上。橙蟹肥時霜滿天。相隨否。算江南江北。惟有君閒。

菩薩蠻（春思）

翠樓十二闌干曲。雨痕新染蒲萄綠。時節又黃昏。東風深閉門。玉簫吹未徹。窗影梅花月。無語只低眉。閒拈雙荔枝。

滿江紅（齊雲月酌）

樓倚晴空。炎雲淨、晚來風力。滄海外、等閑吹上，滿輪寒璧。河漢低垂天欲近，乾坤浩蕩秋無極。凭闌干、衣袂拂青冥，知何夕。登眺地、追疇昔。吳越事、皆陳迹。對清光祇有，醉吟消得。萬古悠悠惟月在。浮生袞袞空頭白。自騎鯨仙去，有誰知、遙相憶。

好事近（秋飲）

雁外雨絲絲。將恨和愁都織。玉骨西風添瘦，減尊前歌力。袖香曾枕醉紅腮。依約唾痕碧。花下凌波入夢，引春雛雙鷁。

蒲江詞終

蒲江詞跋

盧祖皋字中之自號蒲江居士永嘉人樓大防之甥也一時永嘉詩人爭學晚唐體徐照字道暉徐璣字文淵翁卷字靈舒趙師秀字紫芝稱爲四靈與中之倡和莫能伯仲惜其詩集不傳黃叔暘謂其樂府甚工字字可入律呂浙人皆唱之中興集中幾盡採錄或病其偶句太多未足驚目余喜其柳色津頭綠桃花渡口啼紅較之秦七鶯喙啄花紅溜燕尾點波綠皺不更鮮秀邪又玉簫吹未徹窗影梅花月無語只低眉閒拈雙荔枝直可步趨南唐孤枕夢回雞塞遠小樓吹徹玉笙寒矣至如江涵雁影梅花瘦花片無聲簾外雨云云蓋古樂府佳句也惜乎蒲江詞一卷僅僅二十有五闕耳古虞毛晉識